

Uunga siunnersuut: Allagaateqarfeqarneq pillugu Inatsisartut inatsisaat**Saqqummiussinermut allakkiaq**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisunut ilaasortaq)

Aappassaaneerinnineq

Allagaateqarfeqarneq pillugu Inatsisartut inatsisissaattut siunnersuutip aappassaaneerneqannginnerani siunnersuutip tapersorsorneqarneranut iluarisimaarinninnera Naalackersuisut sinnerlugit matumuuna oqaatigissavara.

Aammattaaq Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq isumaliutissiisutaat siunnersuutip ataatsimiititaliamit akuerineqarnissaanik isumaqatigiisummit inassuteqaateqarfiusoq pillugu qutsavigissavara.

Naalackersuisut malugaat Inuit Ataqtigiit oqaaseqartartuata oqaaseqaataani filmiliortarneq TV-milu aallakaatitassiorarneq pillugu immikkut aalajangersagaqarnissaa kissaatigigaa, Ataatsimiititaliaq isumaliutissiisummini allappoq:

”Filminut TV-kullu isiginnaagassiat toqqorterneqartarneranut tunngatillugit atuakkanik atorniartarfiit pillugit inatsit nr. 8. 8. juni 2014-meersuni § 11. imm. 1 aamma 2-mi tunniussisussaaitaanermut aalajangersakkat ataanniippoq.”

Soorlu Ataatsimiititaliaq allattoq Nunatta Atuagaateqarfia tassunga tunngasunik katersugaateqarnermini (Groelandica-mi katersukkat) Kalaallit Nunaanni suliarineqartut avammut saqqummiunneqartut tamaasa katersussavai, nalunaarsussavai pigiinnarlugillu, tassunga ilanngullugit filmiliat TV-milu aallakaatitassiat, takuuk atuagaateqarfeqarneq pillugu Inatsisartut nr. 8, 8. juni 2014-imeersumi § 11. Tunniussisussaaitaaneq pillugu § 21-imi aalajangersagaq naapertorlugu katersugaatit qulakkeerneqassapput, taanna naapertorlugu ilaatigut filmilianik TV-milu aallakaatitassianik naammassillugit suliarinnittut assilinerannik ataatsimik tunniussisussaallutik.

Naalackersuisut aamma ilisimatitsissutigissavaat filmiliat tv-milu aallakaatitassiat siunnersuummi § 5-imi ilaareersut, tassani allaqqammat:

”§ 5. Suulluunniit paasissutissartallit pisortat sullissiveqarfiini sulinikkut pilersinneqartut taakkuluunniit aqqutigalugit pilersinneqartut toqqorneqassapput.”

Siunnersuummi § 5 taamaalilluni annertuneruvoq, tassa ilaatigut filmiliat tv-milu aallakaatitassiat pisortat sulisoqarfiisa ingerlatsinerannut atatillugu pilersinneqartut pissarsiarineqartulluunniit, filmiliat TV-milu aallakaatitassiat saqqummersitat kisimik pinnatik, toqqorneqartussaammata.

Taamatut oqaaseqarlunga siunnersuut Inatsisartunut suliassanngortippara.